

dil qual Domenega fece honorata et bella intrata sier Almorò Donado, et referite di quelle cosse di Padoa, et portò il modello di Padoa et le fortification di la terra. Fo laudato dal Principe, juxta il consueto, et fo breve.

141 Ma avanti el comenzasse a referir, vene uno cavalario di Vicenza, in gran pressa, in Colegio, con dir portava la nuova di Brexa. Et aperte le letere, hessendo molti in Colegio, fono lete; qual erano di sier *Jacomo Manolesso provedador*, che scrive et manda la copia di una letera li à mandà sier *Andrea Griti provedador zeneral*, qual è data in Brexa eri, a dì 26, non dize l'ora. Per la qual li avisa esser intrato in la cità et aver auto il castelo, però si aliegra; et li ha voluto adviar questa bona nova per contento di quelli boni subditi fidelissimi.

Et non molto da poi zonse Zuan Maria dil provedador Griti, con letere di dito provedador, date in Brexa a dì 26, hore 13. Avisa il suo intrar in la terra et aver auto la rocha; et per un'altra aviserà il successo.

Noto. El dito scrive, per letere di 25, come monsignor di Lutrech lo havia pregato dovesse concieder il capitanià dil devedo di Brexa a uno francese, qual fo Item, spera aver danari da' brexani da tre in suso. Item, scrive dito provedador, che si provedi di governo ai lochi dil brexan, et che l'habbi libertà di meter officii in Brexa et custodia a le porte et altrove.

Et venuto dite letere di campo con la verità di l'aquisto di Brexa, tutta la terra fo piena di questa optima nova, et per Colegio fo terminato di far sonar campanò e far fuogi la sera per allegrezza di tutti. Benchè alcuni erano di contraria opinion, tamen fo mandato a far sonar, et fo ben facto.

Da Vicenza, dil podestà *Pasqualigo e provedador Manolesso fo letere, di eri*. Come hanno avisi da quel Zuan Antonio Zen, che a di 23, Venere, l'Imperador partì da Trento con cavali 400 et li foraussiti, et va in Alemagna. Item, par il conte di Chariati era ussito di Verona con alcuni di primi cittadini per andar a Trento a trovar l'Imperador, e dito a le zente, è in Verona, come va per aver danari et tornerà prestissimo.

Di Londra, eri, fo letere particular, di primo Mazo, di sier *Lorenzo Pasqualigo a' suoi fradelli*. Come si dize il Re ha mandà ducati 80 milia e l'Imperador, tamen con ordine al suo orator non li spenda senza duplicato mandato.

Di Bassan, di sier *Piero Antonio Moresini*

I Diarii di M. SANUTO. — Tom. XXII.

podestà et capitano, in conformità. Avisi dil partir di l'Imperador di Trento per Alemagna; il qual fin hora è stato nel castello di Trento.

Di Roma, di sier *Marin Zorzi dottor, orator nostro, di 23*. Come il Papa vol continuar l'impresa contra il ducha di Urbin, et li ha dito s' el veniva a Roma li perdonavemo et investivemo il fiol dil duchato di Urbin et altri lochi, ma hora aziò, el non fuza, perchè l'è una fusta a Pexaro, prega la Signoria sia contenta darli do galie sotil, qual siano armate in questa terra et le tegnirà in Ancona. Item, colloqui di l'Imperador, et li piace il campo nostro con quel di Franza soto Brexa; ma si duol che 400 lanze francese siano andate verso la Mirandola in favor di la fia dil signor Zuan Jacomo Triulzi per remeterla in el Stado et privar il conte Lodovico. Item, come il Papa ha auto una letera dal vescovo di . . . , che li turchi venuti a far danni su quel di l'Imperador in Lubiana, era con loro uno per nome di la Signoria nostra

Di Napoli, di *Lunardo Anselmi consolo*

Da poi disnar, fo Pregadi; fo il Principe, et leto le letere tutte. Fu posto, per i Savii d'acordo, una letera a l'orator in corte, che ringratii di l'operation di Soa Santità a la ricuperation dil Stado nostro. Item, come haveano auto Brexa e il castello d'acordo

Fu posto, per li ditti, una letera a l'orator in Franza, ringratii la Christianissima Maestà di l'operation di monsignor di Lutrech in far che habiamo auto Brexa, et pregi Sua Maestà voy scriverli et cometerli a la recuperation di Verona, perchè da nui non mancherà di far ogni provision per averla, dal canto nostro.

Fu posto, per li ditti, una letera a l'orator nostro in Ingaltera, con ringratiar Soa Maestà di quello sempre l'è fato a beneficio nostro, et havemo auto Brexa e il castello d'acordo et

Fu posto una letera a sier *Andrea Griti procurator, provedador zeneral in campo*, debbi ringratiar monsignor di Lutrech et exortarlo a non perder tempo di recuperar Verona. Item, li havemo mandato danari, et mandaremovi questa sera bona summa et una letera di cambio. Item, aviato le artellarie; et semo contenti esso provedador possi meter a li officii in Brexa chi li par, exceptuando quelli li havesseno auti per i Consigli no-